

Dios cunaumuna'me cheja pāi cho'osi'ere kuamu

Génesis 1.1-31

*Mt 19.4-6; Mr 10.6-8; Jn 1.1-3; 1 Co 11.8-9; 15.45-49;
2 Co 4.6; Ef 5.31; 1 Ti 4.3-4; He 4.3-4; 2 Pe 3.5*

1-2 Aperumu cheja peosomu. Pāijē'e peoju cu'ava'najē'e peosome. Ūcuaja'che cunaumu, aikūjña, chiaraã, chiañaã, sūkijē'e peosomu. Ūcuaja'che ūsuujē'e peoku pāimiauujē'e peoku ma'jñokojē'e peosome. Diochi'a paniasomu.

Ūcuarumu Dios te'eujj ija'che i'kaasomu:

—Chejana'me cunaumu cho'ora chu'u —chiniasomu. Chini chejana'me cunaumu cho'oasomu Repau.

Cho'osirumu cheja miañejē'e peocheja chijachejachi'a paniasomu. Reparumu pa'ichejñajē'e peoche okochi'a pa'iuna Dios Rekochochi'a ñoma'kupi oko sē'sevujj ku'iu paniasomu.

3-4 Jā'ajekuna Dios reparumu ija'che chū'uasomu: “Miañe paau”, chiniasomu. Chikuna miañe paniasomu. Miañe cho'osirumu miañena'me chija'che paniasomu. **5** Repa miañe “umucuse” ve'oasomu Dios. Chija'chere “ñami” ve'oasomu.

6 Jo'e apeñatato okore joopo umuna muoasomu Repau, cunaumupi oko paau chini.

7-25 Jo'e apeñatato Dios ija'che i'kaku jo'e chū'uasomu: “Okokuñujū'u, chejapi paau”, chiniasomu. Chikuna cheja paniasomu.

Jā'aja'ñe cho'o ija'che chū'uasomu Repau: “Sūki si'ache aineea'ku; repañuã kūisi'e jo'e ūcuajañuã aineere'oche pa'iñuã paau”, chiniasomu Dios. Chikuna cheja tachana'me sūki aineea-somu. Repau cho'osi'e ña, “Re'oja'imū ie”, chiniasomu Repau.

Jo'e apeñatato Dios ija'che i'kaasomu: “Pāipi ñaju umucujñana'me pāimia pa'iche ūsurumu okorumu pa'iche masia'ju chini ūsuu'mu pāimiau'mu ma'jñokoa'me cunaumure paau”, chiniasomu. Chikuna Repau i'kasi'e paniasomu. Jā'aja'ñe cho'o Repau cho'osi'e ña, “Re'oja'imū ie”, chiniasomu Dios.

Jo'e apeñatato Dios ija'che i'kaasomu: “Chiacha va'iva'nana'me pī'ava'na si'ache paapu”, chiniasomu. Jā'aja'ñe i'kauna pī'ava'na chiacha va'iva'na paniasome. Cho'o pi'ni ña,

Re'oja'imū ie”, chiniasomu Dios.
Ūcuarumu repava'nare chiacha
va'iva'nare ija'che i'kaasomu Repau:
“Musanukona va'i jainukore jojo
chiañaña'me chiaraã jainuko
pa'ijũ'u”, chiniasomu. Ūcuaja'che
pĩ'ava'nare ija'che i'kaasomu
Repau: “Musanukona pĩ'a jojo
si'achejña jainuko pa'ijũ'u”, chinia-
omu.

Jo'e apeñatato Dios ija'che i'kaa-
omu: “Cu'ava'na airo pa'ijava'nana'me
jo'cha paajava'na rūni ku'iva'nana'me
ũni ku'ina paapu”, chiniasomu. Chikuna cu'ava'na paniasome.
Cho'o pi'ni ña, “Re'oja'imū ie”, chiniasomu. **26-27** Ūcuauumucusena
pãi cho'basomu Dios, umuuna'me romio'te. Cho'o pi'ni ūcuanapi
cheja pa'iva'nare chũ'uju paapu chini chũ'u jo'kaasomu Repau.
Ūcuachi'a Repau pa'icheja'che paapu chini jo'kaasomu Dios
repanare. Cu'ava'nata'ni te'eujẽ'e Dios pa'icheja'che pa'ima'me.

28 Ūcuaja'che Dios
repanare pãi cho'o
pi'ni ija'che
chũ'uasomu: “Chĩ rua
jainukore paajũ'u.
Musanukona chĩi
te'enachi'a cheja
si'achejña sani
paapu”, chiniasomu.
29-31 Chini repañare
pãi jo'e ija'che i'kaa-
somu: “Airoqueere
ãumajñaruã ãiju
pa'ijũ'u musanukona”,
chiniasomu. Repau
cho'osi'e peore ña,
“Rua re'oja'imū ie”,
chiniasomu Dios.

Génesis 2.1-3

1 Repau Dios seirepaumucujña cunaumuna'me chejana'me repacheja pa'imajñaruãna'me pãi cho'oasomu. Seirepaumucujñana peore cho'o pi'niasomu. 2 Chekumucuse rupa paniasomu Repau. 3 Jã'ajekuna Repau maire pãi ija'che chũ'u jo'kaasomu: "Musanukona irumupi vua seirepaumucujña cho'oche cho'oju pa'ijũ'u. Te'eumucuse puamucusejekuna puajũ'u", chini jo'kaasomu Dios maire.

Pãi charo pa'isinare umuuna'me romio'te Dios cho'osi'ere jo'e kuamu

Génesis 2.7-25

7 Aperumu cheja mamarumu Dios cha'opi pãiu'te cho'o repau ñquecojñana jujuuna vajuasomu repau pãiu. Repau Dios jã'aja'ne jujucheji pãiu'te vajuche'te ñiasomu paau chini. Jã'ajekuna pãiu ca'nivuna'me rekocho paamu.

8-16 Pãiu'te cho'o pi'nisirumuna Diopi chũ'uuna Edén cheja otera'ñuruã pa'icheja teana rua re'ojacheja paniasomu Repau cho'osi'ku pa'ijacheja. Jã'aja'ne cho'o Dios pãiu'te ija'che i'kaasomu: "Ichejare pa'ijũ'u mu'u", chiniasomu.

Ûcuachi'a Dios repau'te jo'e ija'che i'kaasomu: "Icheja pa'ima-jñaruãre kuiraku pa'ijũ'u mu'u. Sũkiñuã icheja pa'iñuã kũĩne'te ãiu pa'ijũ'u", chiniasomu. 17 Repacheja pa'iñu sũkiñu te'eñu ãiũseñu paniasomu, repañu kũisi'ere, "Pãipi ãni cu'achena'me re'oja'che masijanaa'me", chiicojñosi'ñu. Jã'ajekuna Dios ija'che i'kaasomu: "Iñu kũisi'eta'ni ãimanejũ'u. Æni jũnisoja'mu mu'u", chiniasomu.

18 Reparumu Dios ija'che cuasaku te'euji i'kaasomu: "Ikure ja'me pa'ikujji karamu", chiniasomu. 19-20 Chini cu'ava'nare Repau cho'osiva'nare jainukore raoasomu, repauni ja'me paapu chini, ùcuachi'a repava'nani ùcuanukore mami ve'oa'ku chini. Jã'ajekuna cu'ava'na rani repau'te ja'me paniasome. Jã'ata'ni repau'te chuta'a ja'me cho'okainapi peojuna karaasomu.

21-23 Jã'aja'ne pa'iuna Diopi uokuache cho'oyna Adán ume kãnisoasomu. Kãnisouna Dios repau meakoricho te'echo ruta ùcuachoji romio'te cho'oasomu. Romio'te cho'o pi'nisirumuna repau Adán vuniasomu. Repau vuisirumu ùcuauuni ja'me paao

chini romio'te jo'kaasomu Dios. Jo'kauna repau Adán rua pojoku ija'che i'kaasomu: “Mu'u chu'u tarapu cho'osi'koa'mo. Jã'ajekuna chu'u mu'ure, 'romio', ve'omu”, chiniasomu. (Repau chu'o i'kache “romio” chini “Ëmuu tarapuji cho'ocojñosi'koa'mo iko” chiimu.) 24 Jã'ajekuna umuu reparumupi vaa irumu-jatu'ka romio'te veja ja'me pani ũcuate'euja'che pa'ime.

25 Ûcuarumu repana umuuna'me romio kãña peova'na paniasome. Jã'ata'ni vajachuamaneasomu repanare.

**Pã charo pa'isina umuuna'me romio
Dios chũ'uñe jachasi'ere kuamu**

Génesis 3.1-24

Ro 5.12-19; 2 Co 11.3; Ap 12.9; 20.2

1 Ûcuarumu Adán romiona'me re'ojachejare paniasome, Dios cho'o jo'kasichejare. Reparumu chekunare cu'ava'nare añapi na'a cajejaiche masiasomu.

Ûcuarumu repau añã Adán rãjore sani ija'che i'kaasomu:

—¿Icheja pa'iñuã sũkiñuã kũĩñe ãmanejũ'u”, chiiku Dios musanukonare? —chiniasomu.

2-3 Chikuna i'kaasomo repao.

—Dios icheja pa'iñuã kũisi'e ãĩñe ãsema'mu. Te'eñu icheja joopo nukañu'te, “Ãmanejũ'u”, chiisi'kua'mu Repau. Ûcuachi'a Dios chukuna'te ija'che i'kasi'kua'mu: “Musanukona chu'u ãmanejũ'u chiisi'ñu kũisi'e chẽamanejũ'u. Jachasoju cho'oni jũnisojanaa'me musanukona”, chiisi'kua'mu Repau —chiniasomo repao.

4-5 Dios chū'usi'ere repaoji kuakona asa añā repao'te joreku ija'che i'kaasomu:

—Ūcuarepama'mu jā'achu'o. Musanukonapi jā'are āni jūni-somanejanaa'me. Dios rupu ija'che cuasamu: “Pāipi repañu sūkiñu kūisi'ere āni chu'u masicheja'che re'oja'chena'me cu'ache masijanaa'me”, chiiu cuasamu. Jā'aja'ñe cuhekujeku jā'añu kūisi'e āiñe ūsemu Repau musanukonare —chiiu jorea-somu repau repao'te.

6 Añapi jā'aja'ñe joreku i'kauna asa repañu kūisi'ere ñaasomo repao. Ña, “Rua re'oja'chea'me repañu kūisi'e. Rua sāija'icosomu ie. Āni Dios masicheja'che masija'mo chu'u”, chini cuasako pojoasomo repao. Jā'aja'ñe cuasako te'era'puru tua āniasomo. Tua āio ūjure sa āukona koo āniasomu repau.

7 Jā'aja'ñe cho'o repanare cuasomanesi'e, “Kāña peova'naa'me mai”, chiiu cuasaasome repana. Jā'ajekuna repanani vajuchua-che cuasokuna higuera ja'opi tua juha ta'piasome.

8-9 Ūcuarumu na'icuhatona Diopi ūcuachejapi asoche ku'iuna asa kukuso katirena Dios Adan'te soiū ija'che i'kaasomu:

—¿Jeechejare pa'iku? —chiniasomu.

10 Chiiuna asa ija'che i'kaasomu repau:

—Mu'u ku'iche'te asa kāa peova'ujeku vajuchuku kati-sosi'kua'mu chu'u —chiniasomu.

11 Chikuna Dios ija'che i'kaasomu:

—¿Neepi musanukonare kāña peova'na pa'iche kuare? ¿Chu'u āimanejū'u chiisi'ere āte musanukona? —chiniasomu
Dios. (Repanapi repañu kūisi'ere āimaneni repana kāña peona pa'iche vesura'ame.)

12 Chiiuna asa Diore ija'che i'kaasomu repau:

—Romioji mu'u chu'ure ja'me pao chini jo'kasi'kopi repañu kūisi'e tua ra ĩsiona āisi'kua'mu chu'u —chiniasomu.

13 Chikuna Dios repao'te romio'te sēniasomu.

—¿Je'se pa'iuna mu'u jā'aja'ñe cho'oo? —chiniasomu.

Chikuna i'kaasomo repao.

—Añapi chu'uni joreku i'kauna tua āisi'koa'mo chu'u —chiniasomo.

14-15 Ūcuarumu Dios añare ija'che i'kaasomu:

—Chura mu'u joresi'e ro'i irumupi vaa nuka ku'ima'ñe mu'u

ca'nivuji ũni ku'iu pa'ijũ'u. Mu'u paasinapi iko paasinare cū'acu'ravaña kūkujanaa'me. Na'a pa'isirumu iko paasi'kupī mu'u paasi'kure cavaku cajejaija'mu —chinasomu.

16 Chini Dios romio'te ija'che i'kaasomu:

—Mu'u rua asicheji chīi cajaja'mo, mu'u chu'u i'kache jachasi'e ro'i. Ũcuachi'a muūjupi mu'ure chũ'uku pa'ija'mu —chinasomu Repau.

17-19 Chini umuu'te ija'che i'kaasomu Repau:

—Mu'u romio i'kache jachama'ñe āisi'kujeku cu'ache cho'osi'kua'mu. Jā'ajekuna cheja miuna'me u'cha rua aineeuna āu tāñe rua cuaja pa'ija'mu mu'ure. Ũcuaja'che mu'u ca'nivu cha'opi cho'osica'nivujeku aireko jūnisoni aperumu pa'icheja'che cha'o carūnisoja'mu mu'u —chinasomu Dios repau'te. Repau umuu Adán ve'easomu. **20** Repau romioji Eva ve'easomo. Pāi ũcuanuko puka'ko pa'ijaojekona rājore jā'aja'ñe ve'oasomu repau.

21 Ũcuarumu Dios repana ju'iju pa'ijache va'iva'na ca'nipi juhasikāñare ĩsiasomu. Jā'ajekuna ũcuakāñare ju'iju paniasome repana. **22** Jā'aja'ñe cho'o te'euji cuasaku ija'che i'kaasomu Repau: “Chukuna masicheja'che re'oja'chena'me cu'ache masime ina chura. Ũcuaja'che repana pa'icheja pa'iñu chekuñu cha'u jo'kasi'ñu kūisi'ere āito cu'amu. Repañu kūisi'e āni jūnisonoma'ñe pa'ijanaa'me repana”, chini cuasaasomu Repau. **23** Jā'are cuheku repanare tūichejana saomasomu Repau, jo'e āimaneaju chini.

24 Repanare saosirumu Dios pāipi repañu kūisi'ere te'eujē'e kaka tua āimaneaju chini Repau pa'icheja cunaumu pa'inana'me va'ti toa pa'iva'ti ũcuate'eva'tipi pachu ku'iva'tire casoasomu, Edén cheja kacheja ũsuu muikā'kore paapu chini.